

第六七六册

經濟彙編

銓衡典

休致部

給假部

起復部

封贈部 命婦附

封贈部

封建部

(卷)

二六

二九—二〇

二二—二三

二三

二四

二五—二六

古今圖書集成

中華書局影印



古今圖書集成

卷一百一十五

欽定古今圖書集成經濟彙編銓衡典

第一百八卷目錄

休致部紀事三

休致部雜錄

銓衡典第一百八卷

休致部紀事三

宋史尹焞傳焞以徽猷閣待制提舉萬壽觀兼侍講固辭奏言臣職在勸講莫有發明期月之間病告相繼坐竊厚祿無補聖聰先聖有言陳力就列不能者止此當去者一也臣起自草茅誤膺名用守道之語形於訓詞而臣貪戀寵榮遂移素守使朝廷非常不次之舉獲懷利苟得之人此當去者二也比嘗不量分守言及國事識見迂陋已驗於今跡其庸愚豈堪時用此當去者三也臣自擢春官未嘗供職以疾乞去更獲超遷有何功勞得以祇受此當去者四也國朝典法揆之禮經年至七十皆當致仕今臣年齒已及加以疾病血氣既衰戒之在得此當去者五也臣聞聖君有從欲之仁匹夫有莫奪之志今臣有五當去之義無一可留之理乞檢會累放歸田里疏上以焞提舉江州太平觀引年告老轉一官致仕焞自入經筵即乞休致朝廷以禮留之張浚趙鼎既去秦檜當國見焞議和疏及與檜書已不樂至是得求去之

疏遂不復留

貴耳集喬平章為左相時年已八十餘因榜府門曰七十者許乞致仕為一輕簿子書一詩於右曰左相門前有指揮小官焉敢不遵依若言七十當致仕八十公公也合歸因是卷榜而入

玉堂雜記紹興二十四年春直學士院湯公思退以禮部侍郎同知貢舉時百官多闕大抵一人兼數職凡進士出身皆入試闈獨留監察御史王公綸蓋備拆號也內制既闕官遂降旨暫權適草劉婉儀進位貴妃制太上稱其有典詰體潤筆始萬緒賜視尤奇秦丞相不樂遣論列去秦薨名還掌內外制知樞密院事垂相而病除大資政留守金陵即其邦也未第時兄弟就食府庠至是人以為榮尋卒官予嘗草其致仕制云少則歌鹿鳴而薦於鄉老則釋麟符而居其里考昔人而或有在近歲以幾希贈官制云古所謂鄉先生者沒則祭於社而後世良二千石民亦奉嘗之爾於二者蓋兼之皆紀實也

癸辛雜識紹興庚戌十月倪文節公思為中書舍人楊文節萬里自大蓬除直龍圖閣將漕江東朝論惜其去公留錄黃欲繳却當奏或以語楊楊亟作簡止之倪公答云賢者去國公論以為不然既辱寵喻不敢復繳却當別作商量也楊公即以所答簡餘紙復止之云死無畏賢幸公哀我併別作商量之說免之九荷公孫黑辭職既而又使子為卿子產惡之至懇至叩不勝激切至以恩府呼之其欲去之意可見也然倪公竟入劄留之云臣聞孔子曰吾未見剛者又曰不得中行而與之必也狂狷乎剛與狂狷皆非中

道然孔子有取焉為其挺特之操可與有為賢於柔

儒委靡患得患失者遠矣若朝廷之上得如此三數輩可以逆折奸萌矯厲具臣為益非淺竊見祕書監楊萬里學問文采固已絕人乃若剛毅狷介之守尤為難得夫其遇事輒發無所顧忌雖未盡合中道原其初心思有補於國家至倦倦也向來勸講東宮已蒙陛下嘉獎陛下踐祚首賜收召晉登冊府士類咸以為當今甫踰年遽兩丐外朝廷以職名清節處之不為不優然而公論以為如萬里者不宜遂使去國錄黃之下臣始欲繳論又為念朝廷此命本是優賢雖已書行而於臣愚見猶欲陛下改命留之蓋萬里再入修門未為甚久儻朝廷以貪賢為意喻之小留萬里感荷君恩豈能復以私計為辭云云蓋二公相知極深也後二十年楊公已亡倪公得復當時手簡不忍棄之遂自錄所上之劄及往來之書裝潢成卷親叙其事於後攻媿樓公嘗跋之云東坡賦屈原廟云雖不適中要以為賢今誠齋有焉昌黎留孔戮事雖不行陳義甚高誠齋有焉九為確論亦可槩想前輩去就之道交情之誼也

丙申之春御筆史嵩之退安晚節已踰十年可特授觀文殿大學士依舊金紫光祿大夫求國公致仕仍盡與宰執恩數令學士院降詔仍免宣鎖越二日奏事右相董槐公云四川屢捷頗為可喜僉樞蔡杭隨奏云大奸復出深為可慮又云近降嵩之指揮外間謂宰臣欲為汲引以報私恩上曰此乃還其致仕恩數耳參政程元鳳奏云臣曩在經筵亦嘗親聞聖訓及此聖意雖堅天下未必盡知兼致仕二字豈能掣

縛之使不出越一日董槐上疏辨明蔡樞之奏欲乞於嵩之致仕指揮之下明示以不復圖任之意庶可白孤蹤釋羣疑所有上項制可未敢施行御批史嵩之復職不過酬以宰臣謝事之恩數耳且其一開十三年中外未嘗任使何緣今日用之仍令致仕指揮甚明正示天下以決不復用之意而予之職名則休致之典備矣豈有他哉斷自朕衷非由啓擬卿其安之林存當制有云高尚不事王侯朕每加于雅志忠愛不忘耿畝爾毋有于遐心公論復以爲未然太學生上書攻董相及鄧泳李仲熊併攻林存董相再奏謂嵩之予致仕恩數臣見凡前執政之罷斥者皆有之不復執奏今則皆歸罪於用事之人伏望姑寢前命御筆云史嵩之復職非由卿請惟朕知之學舍有言但慮其復出耳豈校其職名哉其人決不再用其職亦不可奪所請既不悖理其安之正言邵澤劾姚希得又於希得董試之時捕其館人以賊黥決其人乃已黥之人故也未幾內批史珍卿理卿並與合入幹官差遣既而嵩之又陳請任相位日連書賞時賈夢炎爲國史復申省以其邀求經修經進之賞將來列銜某決不敢預食乞罷免職事嵩之躁進始終不靜真是可厭而朝廷用事豈學校一能把持乎程史孝宗朝尚書郎鹿何年四十餘一日上章乞致其事上驚諭宰相使問其緣何對曰臣無他願德不稱位欲稍矯世之不知分者耳遂以其語奏上曰姑遂其欲時何秩未員郎詔特官一子凡在朝者皆以詩祖之何歸築堂扁曰見一蓋取人人盡道休官去林下何嘗見一人之句而反之也何去國時齒髮壯

不少衰居二年以微疾卒
宋史周執羔傳乾道二年執羔拜禮部尚書歷侍讀拜疏求去上謂輔臣曰朕惜其老成宜以經筵留之除寶文閣學士提舉佑神觀上曰遂除龍圖可也經筵二年每勸上以辨忠邪納諫爭上深知其忠明年三月告老上諭曰祖宗時近臣有年踰八十尚畱者卿之齒未也命却其章閏月復申前請上度不可奪詔提舉江州太平興國宮賜茶藥御書恩禮尤渥公卿祖帳都門外指紳榮之
夢溪筆談有一武人忘其名志樂閑放而家甚貧忽吟一詩曰人生本無累何必買山錢遂投檄去至今致仕尚康寧
齊東野語淳祐甲辰杜清獻範薨游清獻已拜右揆趙葵南仲樞使陳諱子華參政皆一時宿望明年四月游相以大觀文奉內祠侍讀既而趙公出督江淮荆襄湖北軍馬陳公以知院師長沙遂再相鄭忠定清之王伯大吳潛並爲食樞乙巳趙公兼江東帥知建康留鑰趙希至以禮書督府參贊兼江清淮帥丘山甫岳仍兼參謀且頒御筆云趙葵兼資文武協輔國家領使洪樞視師戒道權不可不專申檄處置貴合時宜一應軍行調度並聽便宜施行公既成名夙著邊陲晏然中間屢乞結局不允明年遣隨軍轉運舒澤民滋入白廟堂許令帶職入覲公力辭召命且云更當支吾一冬來春解嚴容歸田里朝廷許之明年北軍大入因復畱行府措置戰守焉中書陸德輿載之轉對疏以爲去歲泗州大捷彼方喪膽落魄今春淮水漲溢欲來不可涉冬而春邊鎮寧謐近者駭

言寇至張大其說或云到儀真之境者止五六十騎耳趙公聞之大不能堪封章屢上力辨此謬朝廷遂爲調停寢其事焉未幾工部尚書徐清吏進故事亦譏其辟屬之濫趙公愈不自安是歲閏二月鄭忠定拜太師趙公拜右相所有督府日下結局遂差右司陳夢斗宣赴都堂治事而陳辭以此貂璫之職不行遂改差御藥謝昌祖往焉夕郎趙以大復有不肯書牘之意事雖不行而公之歸興不可遏矣屢騰免牘且引其父忠肅遺言不許入相之說以告且云寧得罪以過嶺難違訓以入朝御筆不允降旨趣行時陸轍之方居翰苑以嫌不草詔遂改命盧壯武子爲之時趙公各通從官書謂元科降簿內尚餘新格四百餘萬銀絹度牒並不支動且言決不可來之意當時從官作宰相書例有先生之稱至是皆去之獨趙汝騰茂實尚書答書云大丞相高風立懦力疏辭榮昔司馬公固遜密府近崔清獻苦却宰席書之史冊並公而三甚盛休而其微意亦可見也公歸計既決遂申朝廷於三月二十四日散遣將士取道歸伏田里所有新除恩命決不敢祇受既而與告復召然公終不來矣至明年三月御筆趙葵懇辭相位終始弗渝使命趣召亦既屢矣奏陳確論始逾一拜朕眷倚雖切不能強其從也姑畱內祠以便咨訪可除觀文殿大學士體泉觀察使兼侍讀後以疾丐外祠甚力遂以特進判長沙凡五辭得請奉祠徑歸潯陽里第焉蓋一時指紳方以文學科名相高其視軍旅金數等爲俗吏蠹官公能知幾勇退不激不汙可謂善保功名者矣

金史張汝弼傳汝弼拜尚書右丞左丞相徒單克寧得解政務爲樞密使是日汝弼亦懷表乞致仕上使人止之曰卿年未老未可退也進左丞與族弟叅知政事汝弼同日拜族里以爲榮有年未六十而乞致仕者上不許汝弼曰聖旨嘗許六十致仕上責之曰朕嘗許至六十者致仕不許未六十者且朕言六十致仕是則可行否則當言卿等不言皆此類也

紇石烈良弼傳大定十七年良弼以疾辭相位不許告滿百日詔賜告遣太醫診視屢使中使問疾良弼在告既久省多滯事上以問宰相參政張汝弼對曰無之上曰豈曰無之自今疑事久不能決者當具以聞十八年表乞致仕歸田里上遣使慰諭之曰卿比以疾在告朕甚憂之今聞卿將往西京養疾彼中風土非老疾所宜京師中倦於人事若就近都佳郡居處待疾少間速令朕知之良弼奏曰臣遭遇聖明濫膺大任夙夜憂懼以至成疾比蒙聖恩數遣使存問賜以醫藥臣之苟活至今皆陛下之賜也臣豈敢望到鄉里便可愈疾臣去鄉歲久親識多已亡沒惟老臣獨在鄉土之戀誠不能忘臣竊惟自來人臣受人主無逾臣者臣雖粉骨碎身無以報國若使一還鄉社得見親舊則死無恨矣上問宰相曰丞相良弼必欲歸鄉里朕以世襲猛安封其子符寶曷答俾之侍行何如右丞相完顏守道曰不若以猛安授良弼使其子攝事上從之於是授胡論宋葛猛安給丞相俸俸良弼乃致仕歸上謂宰相曰卿等非不盡心但才力不及良弼所以惜其去也

宗室丞相襄傳上頗更定制度議設清閑職位如宋

朝官觀使以待年高致仕之官襄言年老致仕朝廷養以俸廩恩禮至渥老不爲退復有省會之法所以抑貪冒長廉節若擬別設恐涉於濫

元史察罕傳察罕爲榮祿大夫平章政事暮年居德安白雲山別墅以白雲自號嘗以病請告暨還朝帝御萬歲山圓殿與平章李孟入謝帝曰白雲病愈邪頓首對曰老臣衰病無補聖明荷陛下哀矜放歸田里幸甚不覺沉痾去體爾命賜茵以坐顧李孟曰知止不辱今見其朕始以荅刺罕不憐吉台囊加台等言用之誠多裨益有言察罕不善者其人即非善人也察罕天性孝友田宅之在河中者悉分與諸昆弟昆弟貧來歸者復分與田宅奴婢縱奴爲民者甚衆故人多稱長者既致仕優游八年以壽終

主磐傳磐爲太常少卿移疾家居帝遣使存問賜以名藥磐嘗於會集議事之際數言前代用人二十從政七十致仕所以資其材力閱其衰老養其廉恥之心也今人仕者不限年而老病者不能退彼既不自知恥朝廷亦不以爲非甚不可也至是以疾請斷月俸毋給自秋及春堅乞致仕帝遣使慰諭之曰卿年雖老非任劇務何以辭爲仍詔祿之終身併還所斷月俸磐不得已復起後復以年老乞骸骨丞相和禮霍孫爲言詔允其請進資德大夫致仕仍給半俸終身皇太子聞其去召入宮賜食慰問良久行之曰公卿百官皆設宴以饒明日皇太子賜宴聖安寺公卿百官出送麗澤門外縉紳以爲榮

遵聞錄羅復仁吉水人國初時爲編修後乞休致太祖賜以布衣而題其裾曰性雖蠹率忠直可喜賜此

布衣放歸田里

賢奕劉忠宣大夏自戶部侍郎予告歸構草堂於先壘之次讀書其中作東山賦以見志平生不爲人通私書請託藩臬守令往造者不謁謝薄田僅足供衣食里鄰或肆侵奪任弗與爭公言財貨須務農服賈凡力得者獲用其餘易致之物終非己有子孫視之亦不甚惜况官貨恃入者乎後起大司馬歸仍居草堂再著東山後賦載笠乘驢往來山水間

太宰漁石唐公致政家居時出入惟徒步有陳大參良謨者說之曰翁官居八座年邁七旬故天下大老也孔子曰吾從大夫之後不可徒行翁學孔子者而顧欲過之耶公曰固然第吾楓山先師致政歸祇是步行未嘗乘輜姪朴菴公及竹澗潘公俱守此禮吾安敢違耶吁浙有楓山殆猶魯有岱嶽其遺規所雷諸公皆率履弗越如此

駒陰元記閩寧德崔用吉昌知河源縣甫二年求歸作詩曰此心原不爲官縻當道云何不允辭食餌游魚隨釣去知還倦鳥傍巢飛除兇幸喜輶戈甲拯溺還須緩輶絲幾度欲歸歸未得故園松菊繁遐思尋以憂歸不起林居二十年未嘗以私干人時論頗稱之

尊俎餘功林粹夫謝中丞事歸杜門謝塵囂以著述自娛聞時有頗僻意有所觸則發爲樂府命小童歌之歌竟則陶然以怡未嘗一至公所有事於閭者率先加禮公以方巾古服接之有謀焉則以大體相告未嘗委曲循其意

名山藏典謨記宋樂四年閏七月周文以待讀學士

致仕陸辭賜坐良久曰卿篤學惇德宜在左右春秋高矣故遂卿請周文頓首謝命賜酒饌綵幣給傳還鄉

成化十五年十月太子少保戶部尚書楊鼎乞致仕不許再請許之賜勅曰卿歷官翰苑纂修講讀効勞良多殫心戶部國賦通融厥績茂焉朕方圖任老成卿乃引年至再茲特允請給驛舟送歸仍令有司月給米二石歲撥入夫四備贍用夫優老敬賢者朕之心執禮養恬者卿之志功成身退者士之榮去國懷忠者臣之厚卿篤念此尚優游田里化導鄉人使風俗歸淳治理臻盛則足副朕眷卿亦永終譽哉時方簡臣朝論以為優

成化十九年二月戶部尚書翁世資乞致仕上曰卿乞休者屢朕不違卿志加卿太子少保給驛以歸有司月給米二石歲辦應役人夫四賜勅曰朕聞義易繫終吉之辭禮經明進退之節卿累疏求去蓋得節於禮經朕用錫卿終吉之福卿歸念之優游田里化導鄉人俾後賢觀法風俗淳厚則治理自臻足副朕眷遇之懷是舉也朝恩以為渥

成化二十二年九月南京兵部左侍郎馬顯乞致仕許之上批顯疏曰南京米貴民饑尚書王恕參贊機務無一策賑濟知其老劣矣可革太子少保亦令致仕工部主事王純奏曰昔莊助論及黯於漢武帝稱為社稷之臣臣謂如恕近之乞賜寬假仍復其官上曰恕未有社稷功何得妄引命杖訊純降二級外調之遂改兵部尚書馬文升於南京以代恕

暖姝由筆成化間羅狀元倫乞致仕上不允問居政

與致政孰樂因獻詩曰醉裏功名夢裏拋青山自結白雲巢迎將化雨多栽藥準備秋風厚蓋茅白髮滿簪陶令菊綠陰高繫仲尼匏有人若問興亡事請把韋編玩一交

百可漫志金臺李縉卿紳會考覈以浮淺由光祿少卿補忻州知州三疏乞致仕有曰郡縣之職非循良豈弟者弗稱茲以浮淺淺露之名而責其循良豈弟之政蓋亦難矣既得請以歸署聯云五斗懶將雙膝屈三章乞得一身閑

見聞錄吾鄉陸公平泉以祭酒北上唐荆川先生方以禦倭為淮揚巡撫置酒送別及陸公祭酒告病歸復遇荆川先生於淮揚先生相顧嘆曰公已得請告但不佞尚無歸期耳陸公云某如人家教書先生先生有病主人只索放他回去若老先生乃好郎中病勢未愈如何肯放回來

名山藏臣林記王恕憲宗時天下無事廟堂之上內而宦戚外而閣部各引置私朋及汪直李孜省內外交結得進退大臣大臣多為下唯恕著節無所撓公卿大臣皆側目天子亦漸心厭之最後所言政令失信尤中上諱會南京兵部右侍郎馬顯以病告忽附批落恕太子少保以尚書致仕工部主事王純請畱恕比之汲黯上下純獄外調之而恕名益高

唐順之為吏部稽勳主事調考功會改部屬為翰林順之薦改編修病告相懇為畱其疏不下而順之不肯供職有旨令致仕自後無得復用

何塘選翰林院庶吉士改編修不納乏交不入要門搢紳重之當劉瑾時諸翰林相約見瑾長揖而已既

入前有跪者璫在後奮聲曰何背約也出乞休歸武宗即位劉大夏條陳十許事皆剴切有詔施行而上方少從左右狎游時戴珊已卒大夏與馬文升相繼乞骸詔進光祿大夫太子太保賜璽書乘傳續廩給夫廩行賜白金綵幣寶鏤李夢陽為東山草堂歌送之跌宕悲壯天下傳焉

林俊為刑部尚書五乞歸最後八上因為上述孝宗皇帝時劉健謝遷等故事言自古未有不親大臣而能治者將歸之言惟聖明納焉遂許之歸特加太子太保與驛還鄉令有司給米與夫歲時存問

楊廉嘉靖初陞南禮部尚書取大學衍義撮其切要進之經筵大禮之議不行八疏乞休許之給驛廩與夫歸且賜勅諭曰卿才行老成譽望素著委任方殷乞休甚力其歸順神葆和茂躋壽考著書樂道潤色太平廉感激泣下

吳廷舉為工部尚書具疏乞休上慰畱之廷舉且畱戶部主事陳琛以詩規廷舉廷舉手牘請琛曰公謂可歸即歸矣遂再疏請疏引白居易張諫詩月俸百千官二品朝廷雇我作閑人天下太平無一事江南閒煞老尚書之語疏中有嗚呼二字上怒廷舉侮慢無人臣禮令致仕

休致部雜錄

聞見近錄張文定嘗云在翰林時當章公致政麻命下同宋景文往賀之因語之曰昨日宣召受旨上眷遇之意甚厚何遽謝事也邵公曰不可待不厚時引去也又曰亦恐更老則忘了矣文定與景文相顧而笑退而相語曰是何言歟何忘之有及老矣乃知邵公之言為然蓋在得之時與奪每為思慮所惑不若少時能斷故孔子所以戒也文定自六十七後遂屢請歸予嘗論之陽舒而陰斂物之理也及其老矣陽衰而陰盛是以好斂之意生君子終始之際可不慎乎

風璞閑居用綠野乃裴度於文宗時畱守東都治堂雖野服蕭散不問事時尚保釐畱臺非閑居事也宮觀用蓮社乃白居易致仕與僧如滿在香山修淨土號白蓮社是致仕後事

清波雜志祿豈須多防滿則退年不待暮有疾便辭仕者若守此戒則不辱不殆可全始終進退之節項見洪慶善書此語於座屏然晚有南荒之謫蓋亦昧於勇退士大夫能明哲保身以全終始者寡矣

石林燕語唐致仕官非有特勅例不給俸國初循用唐制至真宗乃始詔致仕官特給一半料錢蓋以示優賢養老之意當時詔云始足材而盡力終告老以乞骸賢哉雖嘆於東門邈矣遂辭於北闕用尊者德特示殊恩故士之得請者頗難慶曆中馬季良在謫籍得致仕言者論而奪之蓋以此其後有司既為定制有請無不獲人浸不以為貴乃有過期而不請者於是御史臺每歲一檢舉有年將及格者則移牒諷

之今亦不復舉矣

東坡志林賀下不賀上此天下通語士人歷官一任得外無官謗中無所愧於心釋肩而去如大熱遠行雖未到家得清涼館舍一解衣漱濯已足樂矣况於致仕而歸脫冠佩訪林泉顧平生一無可恨者其樂豈可勝言哉予出入文忠公門最久故見其欲釋位歸田可謂切矣他人或荷以藉口公發於至情如饑者之念食顧勢有未可者耳觀與仲儀書論可退之節三至欲以得罪病而去君子之欲退其難如此可以為進者之戒

避暑錄語張平子作歸田賦興意雖蕭散然序所懷乃在仰飛纖纖俯敷清流落雲間之逸禽懸清淵之魴鱸吾謂釣弋亦何足為樂人生天地之間要與萬物各得其欲不但適一己也必殘暴禽魚以自快此與馳騁弋獵何異如陶淵明言攜幼入室有酒盈樽悅親戚之情話樂琴書以消憂此真得事外之趣讀之能使人盎然覺其左右草木無情物亦皆舒暢和豫平子本見漢室多事欲去以遠禍未必志在田園故有激而言耳宜其發於胸中者與淵明不類也

揚子雲言谷口鄭子真耕乎岩石之下名震於京師世以為賢吾謂子真非真隱遁者也使其方且遯名未暇尚何京師之聞乎若司馬季主李仲元乃當近之然猶是世間知有是人也彼世所不得知如哭龔勝老人言龔生竟天天年非吾徒者或其人乎乃知此一流世固未嘗之亦不必在山林岩穴也自晨門荷蓀長沮桀溺之徒孔子固志之矣雖其道不可以訓天下非孔子所得與然每相與聞而載其言亦微

以示後世也但士之涉世者欲為此不可得能為黃叔度其猶庶幾乎蓋雖未嘗絕世而世終不能為之累所謂汪若萬頃波者非郭林宗無以知之似優

於子真管幼安亦其次也此三二人者幸生孔孟時必皆有以處之自唐而後不復有此類往往皆流入為浮屠氏故其間傑然有不可拔者惜其非吾黨難與並論吾謂雲門臨濟趙州數十人雖以為晨門荷蓀之徒可也白樂天與楊虞卿為姻家而不累於虞卿與元稹牛僧孺相厚善而不黨於元稹僧孺為裴晉公所愛重而不因晉公以進李文饒素不樂而不為文饒所深害者處世如是人亦足矣推其所由得惟不汲汲於進而志在於退是以能安於去就愛憎之際每裕然有餘也自刑部侍郎以病求分司時年纔五十八自是蓋不復出中間一為河南尹期年輒去再除同州刺史不拜雍容無事順適其意而滿足其欲者十有六年方太和開成會昌之間天下變故所更不一元稹以廢斥死李文饒以譏嫉死雖裴晉公猶懷疑畏而牛僧孺李宗閔皆不免萬里之行所謂李逢吉令狐楚李珣之徒泛泛非素與游者其冰炭低昂未嘗有虛日顧樂天所得豈不多哉然吾猶有微恨似未能全忘聲色杯酒之類賞物太深若猶有待而後遣者故小蠻樊素每見於歌詠至甘露十家之禍乃有當君白首同歸日是我青山獨往時之句得非為王涯發乎覽之使人太息空花妄想初何所有而况冤親相尋繳繞何已樂天不唯能外世故固自以為深得於佛氏猶不能曠然一洗電掃冰釋於無所有之地習氣難除至是要之若飄瓦之擊虛

舟之觸莊周以爲至人之用心也宜乎

韓退之孔戣墓誌言古之老於鄉者將自佚非自苦
閭井田宅具在親戚之不仕與倦而歸者不在東阡
在北陌可杖屨來往也謂戣爲無是欲畱之此姑爲
說以畱戣可也若必待此而後可去豈善爲戣計者
耶戣時年七十二歸不及歲而卒如退之所云閭井
田宅親戚誰且無之顧不必盡求備能如戣毅然剛
決固已晚矣若又不能是終不可去乎王述乞骸骨
自序其曾祖昶與魏文帝牋曰南陽宗世林少得好
各州里瞻敬年老汲汲自勵恐見廢棄時人咸共笑
之若天假其壽致仕之年不爲此公婆娑之事述時
年方六十三辭情慷慨自出其志是以卒能踐之不
但爲美談也

阮裕爲臨海太守召爲祕書監不就復爲東陽太守
再召爲侍中又不就遂還剡中以老或問裕屢辭聘
召而辛二郡何耶曰非敢爲高吾少無宦情兼拙於
人間既不能躬耕必有所資故曲躬二郡豈以聘能
私計故爾人情千載不遠吾自大觀後叨冒已多未
嘗不懷歸而家舊無百畝田不得已猶爲汝南許昌
二郡正以不能無資如裕所云既罷計昌俸廩之餘
粗可經營了伏臘即不敢更懷軒冕之意今衣食不
至乏絕則二郡之賜也但吾歸而復出所得又愈於
前則不能無愧於裕

杜佑爲司徒年過七十未請老裴晉公爲舍人因高
郢致仕命辭曰以年致仕抑有前聞近代寡廉罕由
斯道蓋譏之也元祐初詔起范蜀公爲提舉萬壽觀
力辭不至其表曰六十三而致仕抑有前聞七十四

而復來豈云得體蜀公性真純暮年文字尤簡直不
甚經意時文潞公方以太師入爲平章軍國重事覽
之笑曰景仁也不看脚下知其意不在己也

東漢鄭均致仕章帝賜尚書祿終身時號白衣尚書
則漢致仕無祿也唐制亦然而時有特給者

本朝宰相以三師致仕者元豐以前惟三人趙韓王
太師張鄧公太傅王魏公太保元豐末文潞公始以
太師繼之

國朝宰相致事從容進退享有高壽其最著者六人
張鄧公八十六陳文惠八十二富韓公八十一杜祁
公八十李文定七十七龐頴公七十六文潞公雖九
十二而晚節不終士論惜之張鄧公仍自相位得謝
尤爲可貴

行營雜錄有士人貧甚夜則露香祈天益久不懈一
夕忽聞空中語曰帝閔汝誠使我問汝所欲士答曰
某所欲甚微非敢過望但願此生衣食盡足逍遙山
水間以終其身足矣空中大笑曰此上界神仙之樂
何可易得若求富貴則可矣予因歷數古人極貴念
歸而終不遂者皆是蓋清樂天所靳惜百倍於功名
爵祿也

燕翼貽謀錄國初致仕以旌表士大夫之恬退者非
如後世已死僞爲之也眞宗時主客郎中謝泌言致
仕官如清名爲衆所推粗有勞効方可聽其納祿咸
平五年五月丙戌詔年七十退者許致仕如因疾或
歷任有贓犯者不在此限大中祥符九年正月詔乞
致仕者審官院具歷任有無贓犯檢勘吏部申上取
旨仁宗天聖四年始詔郎中以上致仕與一子官明

道元年二月甲子又詔員外郎以上致仕者錄其子
爲祕書省校書郎三丞以上爲太廟齋郎二年正月
庚寅又詔三丞以上致仕無子聽官嫡孫若弟姪一
人降一等凡此者皆以利誘之也景祐三年六月甲

戌侍御史司馬池上言文武官年七十令自陳致仕
依舊勅與一子官如分司給全俸違者御史臺糾察
特令致仕更不與子官及全俸詔榜朝堂皇祐三年

二月戊子又詔文武官年老無子孫奏養親一人至
和元年十二月庚子又詔文武官年七十以上未致

仕更不考課遷官有功於國有惠於民勿拘嘉祐三
年十二月辛未又詔年七十居官犯事未致仕更不

推恩子孫凡此者皆以法繩之也慶曆二年六月壬
申朔御史中丞賈昌朝上言臣僚年七十筋力衰者

優與改官致仕詔從之此以實勸之也况法初行須
受命之後陳乞恩澤病者尚不許豈容已死僞爲其

後又限以受命後身故者方許陳乞恩澤後又但以
陳乞後身故者放行而詐僞者公行不思矣今士大

夫解官持服批書丁憂月日或與其父致仕月日自
相抵牾有司未嘗詰也至徽宗朝始放行員外致仕

恩澤政和二年張克公乞依武官副使非降黜中身
亡者聽陰補從之詳考前後詔令肇端於眞宗之朝

而詳密於仁宗之朝待之甚厚防之甚嚴責之甚備
然上勞聖訓丁寧至於六七而不已亦可見風俗之

日趨於薄而士大夫能守知足之戒者鮮矣

嬾眞子禍福茫茫不可思大都早退是先知當君白
首同歸日是我青山獨往時顧素琴應不服憶率
黃犬定難期蛟龍作醺麟爲脯何似泥中拽尾龜右

白樂天遊玉泉寺詩李訓鄭注初用事公知其必敗輒自刑部侍郎乞分司而歸時宰相王涯好琴舒元與好獵故及之而拽尾龜所以自喻也龍臨事見左氏麟脯事見列仙傳

讀書鏡秦檜嘗語王葆曰檜欲告老如何葆曰此事不當問葆檜曰他人不敢言以公有直氣故問爾葆曰果欲告老不問親讎擇可任國家之事者使居相位誠天下生民之福檜默然正德初關中盛傳朝議欲起三原王端毅公秦左史汝南張景晟上詩曰八十者年一品官歸來清節雪霜寒雖然海內歸心在可奈君前下拜難鷗鷺恐疑威鳳起風雲長護老龍蟠三公事業三槐傳畱取完名久遠看王公得詩大悅夫大臣去就出處上係社稷安危下係士林瞻表故薦得數輩賢才乃可弛乾坤之負擔養得百年名節方能傲風月之全身

王旦從東封車駕回過陝魏野寄以詩云聖朝宰相年年出公在中書十二秋西祀東封俱已了好來相伴赤松遊旦袖此詩求退就得謝寇準自末與被召野亦以詩送之云好去上天辭富貴却來平地作神仙公得詩不悅後二年貶通州每題前詩於窻朝夕吟哦之說者謂寇萊公之南遷不如王文正之早退然公題驛亭詩未必不晚悟魏處士者其詩云沙堤築處迎丞相驛使催時送逐臣到了輸他林下客無榮無辱自由身夫榮辱猶自小事若夫一朝綰印千里輿棺此又更輪牖下老人一著也

東谷云造化之於人不靳於功名富貴而獨靳於閑天地之間機發輪轉無一息停焉天地且不得閑而

閑豈人之所易哉高爵厚祿清資顯秩不知其機其間樂恬退者甚鮮日惟買田營第不獲一見而先身殞者有矣又有築舍返耕高潔自許一入私室作搖尾乞憐之言為干時求進之牘囊篋鎖鑰端端於手收支簿書介介於懷一日十二時無一隙得暇所謂好山好水清風明月何嘗見此風景何嘗識此旨趣勞勞擾擾死而後已若夫富貴家翁田舍翁又不足道也中峰禪師云入世間則忠於君孝於親以盡其義不可不忙出世間則親師擇友朝參暮叩以盡其道又不可不忙惟孜孜以安閑不擾為務而不肯斯須就勞者故聖人斥之為無慚人夫此二語皆非定論但當極忙時宜省東谷之言以濬俗情極閑時又宜省中峰之言以期情習

野客叢談唐人秦疏乞退休多數幾當退孔戣之章是其一者如司空圖三宜休李泌五不住之說嘗考漢人乞退之章嘗有是體如王鳳上疏乞骸骨謝上曰陰陽不調災異數見咎在臣鳳奉職無狀此臣一當退也五經傳記師所誦說咸以日食之咎在於大臣非其人此臣二當退也河平以來臣久病連年數出在外曠職素餐此臣三當退也

游宦紀聞朱文公移簡輔漢卿云得趙昌父書以致政大夫見呼此甚真實而又雅馴可為報同社諸人今後請依此例也

觚不觚錄隆慶即位恩詔文職五品以上以禮致仕者進階一級於是致仕尚書左右都御史皆腰玉侍郎至按察使皆腰犀兕都御史至知府皆腰花金而僉事郎中府同知皆腰金戴褐蓋事稍稍聞於內一

時八座諸公尤不平謂我輩未滿九載尚不得玉而彼坐不稱而退者乃玉耶於是言官申明其事謂尚書未滿初考進一階止當日資政大夫滿考授資政者止當日資德大夫授資德者方可曰榮祿大夫得換服色以下皆倣此因通行天下裁正而腰玉與犀金之徒如故也余竊不敢以為然以為階者所稱大夫也級者品級也必隔品而謂之級若只在本階則所謂陞一級與陞俸一級者當何處耶且考之祖宗恩典皆然間與故相華亭公及之公即草是詔者答曰公言是也當時實以為國家曠蕩之恩第所謂被彈劾考察致仕者不當援耳自後新鄭草赦詔第云進本一階則林下之臣被恩者無幾而諸公之自相貴者復自若也一南兵部署員外主事以考察去者一知州被革者忽兩進其階曰朝列大夫一府同知後恩詔半歲而考察去者亦署曰朝列大夫金紫塞途見者扼腕而無如之何所謂知州者以進階高會其乃弟亦大僚也忽茫然曰恨世宗不數赦則吾兄且腰玉也又聞舊一輪栗指揮使凡四親恩詔輒刻一牙章最後曰特進光祿大夫柱國此二事可為進階者助捧腹

國家於大計京察尤重其責貪官尤深故每遇恩詔於冠帶間往致仕為民復官冠帶者必曰不係朝覲考察而王午詔草當事者矯前人之刻而收人心遂除此語而囊金如山草芥人命者擁冠蓋揚揚門里間矣

南京六部都察院之長嘉靖以前有乞休及起用而辭者往往奉旨不允而稱卿以畱之惟下吏部議覆

不得不斥姓名爲去雷耳嘉靖之末迨於近世惟林尚書雲同一次稱卿且有褒語爲異恩其他卽吳萬二公皆故大宗伯吳之位少保爲三孤而皆下之吏部直斥姓名反以爲故事殊不知其非故事也

百年前京堂翰林諸公使事還里及以禮致仕若在告者謁巡按按察司兵道則入中門走甬道巡撫布政司府州縣則由旁門走東階蓋以桑梓之重與特惠者有分別耳吾吳朱恭靖公希周最名爲恭謹然尚馳御史中門甬道爲提學胡直所強下階胡嘗爲余言之余不敢對近者寧波張尚書時徵欲馳撫按監司甬道遂至兩不相聞而華亭董侍郎傳策馳甬道甬亦退有煩言今遂無此事矣

西峰淡話西楊嘗扈從年七十矣特給輿卒二十人本朝給輿夫與致仕官最爲殊恩然四人六人多至八人而止此以扈從出塞故至二十人亦無兩也見聞錄陸平泉先生以宗伯請告諸大老送之時李公己趙公錦皆在坐趙公曰觀老先生此行使天下也曉得朝廷之上有不愛爵祿之臣李公旋曰陸老先生實有病他豈是忘國的人兩公此語皆是兩篇大文字

又里王懼不自安遂病滿三月賜告與妻子歸本國

取念言念之有長偈快偈

憲宗元祐元年今常參官寒食得假拜墓

按唐書憲宗本紀不載 按舊唐書憲宗本紀元和元年二月戊辰詔常泰官寒食拜墓在畿內聽假日往還他州府奏取進止

懿宗咸通十四年令刺史除授正衙不得託故請假其內外除官入京未朝謝不得請假歸家

按唐書懿宗本紀不載 按舊唐書懿宗本紀咸通十四年春正月丙寅御史中丞韋蟾奏應諸州刺史除授正衙辭謝後託故陳牒請假實為容易自今後如實有故為衆所知者三日外不在陳牒之限應內外除官入京合便朝謝如遇假日且合在都亭驛近日多因請假便歸私家既犯條章頗乖禮教自今已後望準故事如未朝謝須於都亭驛如違越臺司勘當申奏從之

宋

太祖開寶九年夏四月己未著令旬假為沐浴

按宋史太祖本紀云云

真宗大中祥符五年閏十月壬申立先天降聖節五日休沐

按宋史真宗本紀云云

仁宗慶曆二年秋七月癸亥詔京官告病者一年方聽朝參

按宋史仁宗本紀云云

慶曆三年九月丁丑詔執政大臣非假休不許私第受謁

按宋史仁宗本紀云云

欽宗靖康元年夏四月乙卯詔自今假日特坐百司毋得休務

按宋史欽宗本紀云云

金

海陵貞元元年定百官遇喪給假例

按金史海陵本紀貞元元年冬十月丙子命內外官聞大功以上喪止給當日假若父母喪聽給假二日著為令

世宗大定十七年正月丁巳詔朝官嫁娶給假三日不須申告

按金史世宗本紀云云

章宗明昌元年令百官寒食及祖父母父母忌日並給假

按金史章宗本紀明昌元年二月壬寅諭有司寒食給假五日著於令三月丁丑制內外官并諸局承應人遇祖父母父母忌日並給假一日

承安四年冬十月壬午初定百官休假

按金史章宗本紀云云

泰和三年二月甲子定諸職官省親拜墓給假例

按金史章宗本紀云云

元

世祖中統三年定官員給假之例

按元史世祖本紀不載 按選舉志凡官員給假中統三年省議職官在任病假及緣親病假滿百日所在官司勘當申部作闕仍就任所給據期年後給由求敘自願休閒者聽

在任因病求醫并告假侍親者擬自離職住俸日為始限一十二月後聽仕其之任官果因病思事故不能赴任自受除日為始限一十二月後聽仕 又部擬凡外任官日久不行赴任除行程并裝束假限外違者計日斷罪

至元二十七年令百官遇喪葬給假者定其限

按元史世祖本紀不載 按選舉志至元二十七年議祖父母父母喪亡遷葬者許給假限其限內俸鈔擬合支給違例不到停俸定罪

至元二十八年令官吏病假百日外停俸作闕

按元史世祖本紀不載 按選舉志至元二十八年部議官吏遠離鄉土不幸患病難議截日住俸果有患病官吏百日內給俸百日外停俸作闕

成宗大德元年聽雲南官員解任奔喪

按元史成宗本紀不載 按選舉志大德元年議雲南官員如遇祖父母父母喪葬其家在中原者並聽解任奔赴

文宗至順二年詔議百官給假省親之例

按元史文宗本紀至順二年十二月癸丑河南河北道廉訪副使僧家奴言自古求忠臣必於孝子之門今官於朝者十年不省親者有之非無思親之心實由朝廷無給假省親之制而有擅離官次之禁古律諸職官父母在三百里於三年聽一給定省假二十日無父母者五年聽一給拜墓假十日以此推之父母在三百里以至萬里宜計道里遠近定立假期其應省親而不省親者坐以罪若詐冒假期規避以掩其罪與詐奔喪者同科御史臺臣以聞命中書省

禮部刑部及翰林集賢奎章閣議之

明

明定南京官吏給假省親及告送幼子還鄉之例

按明會典凡南京各衙門官員奏行給假省親本部

創送應天府給引定限回任若遠限一年半以上本

部暫令到任管事具奏請旨照例送問 凡南京各

衙門官吏告送幼子還鄉行勘明白定限送應天府

給引照同

太祖洪武 年定內外官給假之例

按明會典凡給假洪武間定內外官吏給假省親還

葬者俱自行具奏取自上裁如准吏部覆奏量地遠

近附簿定限行移應天府順天府給引照回仍行

體勘至期各還職役不在作缺之數如遠限日久不

至者就行提問其考滿吏給假別無黏帶就行定限

除路程日期外別與假一個月在家俱給引照回

凡外官患病洪武間令在外大小官員不許養病

洪武二十六年定官吏求終養及自告老疾之例

按明會典洪武二十六年定凡官員父母年七十以

上許令移親就祿侍養如果父母老病去官路遠戶

內別無以次人丁者方許親身赴京面奏揭籍定奪

及吏員入等父母年老別無人丁者務將經由本部

移文體勘是實明白奏准方令離役俱候親終服滿

起復赴部聽用 凡內外官吏自告老疾者洪武二

十六年定劄付太醫院轉行惠民局委官相視分別

堪與不堪醫治明白具奏取自上裁如不堪醫治奏

放爲民如急難醫治具奏放回原籍調理痊可之日

成祖末樂七年詔給百官元宵節假十日著爲令

按名山藏典謨記永樂七年正月諭禮部臣曰高皇

帝君天下三十餘年法度明備朕恪遵成憲庶幾早

康恩與民同樂其賜元宵節假十日自正月十一日

爲始百官朝參不奏事有急務封疏處分軍民張燈

飲酒五城兵馬弛夜禁著爲令

仁宗洪熙元年定廷臣展省者賜鈔有差外官滿三

考聽給假省親

按名山藏典謨記洪熙元年正月上曰比令廷臣展

省則有養祭賓客若往還道里費官俸給日用而已

計餘資鮮矣自今一品二品歸者賜鈔五千貫三品

四品四千貫五品二千貫六品七品千貫八品以下

皆五百貫著爲令三月命外官滿三考者聽給假省

親

宣宗宣德元年令外官考滿到部者許給假省祭

按明會典凡外官九年考滿到部者宣德元年奏准

許給假省祭除以後不許

代宗景泰六年定聽選監生等給假之例

按明會典凡聽選監生并考滿起復裁減等項官員

守候日久者景泰六年議准許給假依限回部聽用

英宗天順二年令各衙門送到辦事官許回省祭其

御史不許養病省親

按明會典凡辦事官天順二年奏准辦事滿者數多

不必候類奏各衙門送到查審明白即送順天府給

引照回省祭以次取用 凡出差御史患病天順二

年令御史不許養病省親

按明會典凡出差御史患病成化二年令御史久病

勘實許還籍調理

成化五年令監生給假不許違限

按明會典成化五年令監生給假違限三年之上者

送問未及三年告有事故文憑俱免究

成化六年令有司官告老疾者放回作缺

按明會典成化六年奏准各處撫按官遇有司府州

縣官告稱老疾者依例放回原籍俱類奏作缺

成化十一年定朝官省祭之例

按名山藏典謨記成化十一年八月命朝官離家十

年者方許省祭

成化 年令公差官患病填註手本

按明會典成化間令文武官員公差患病等項呈堂

出印信手本填註門籍候病痊及公差回還之日仍

用手本開註

成化二十三年詔京官得給假省親

按明會典成化二十三年詔兩京文職有離家六年

欲給假省親查無違礙者聽

孝宗弘治十五年定進士患病給假之例

按明會典凡進士患病弘治十五年奏准令在京調

理兩月未痊行太醫院診視是實各取具辦事衙門

官員同辦事進士及醫士保結方許放回調理

弘治 年定百官給假省祭及送幼子等例

按明會典弘治間定兩京給假省祭官員除往同水

程外許在家兩箇月違限一年以上者住俸五箇月

一年半以上者送問 凡送幼子弘治間定官吏監

月違限半年以上者送問監生吏典給引放回凡
畢姻弘治間定京官及進士奏乞畢姻行同鄉官員
保勘明白具奏定奪

世宗嘉靖六年定京官患病給假之例

按明會典凡京官患病嘉靖六年令京官告病者吏
部查驗的實照例放回若託故詐病扶同保勘及病
痊不起任者一體罷職

嘉靖七年令出差御史告病查實放回

按明會典凡出差御史患病嘉靖七年令各處御史
有告病者該部查勘是實方准放回若係推避就令
致仕

嘉靖八年令御史等官養病不得違限三年進士不
在此例

按明會典嘉靖八年令御史養病三年以上者革職
冠帶閒住凡京官進士養病違限舊例延至三年
外起送赴部者革職若到部雖在三年之外起文尚
在三年之內具奏定奪嘉靖八年議准各官養病限
內丁憂及起文在二年之內者與違限情似不同進
士未經受職亦難與各官概論許吏部催取聽選

嘉靖十二年令進士養病不得違限三年

按明會典嘉靖十二年令以後進士養病但違限三
年以上者一體查革

嘉靖十三年令百官親老有兄弟仕外者許終養

按明會典嘉靖十三年奏准親老而兄弟俱仕在外
無人侍養者許放回終養

嘉靖十五年令百官親老有兄弟篤疾者許終養

按明會典嘉靖十五年奏准親老雖有兄弟篤疾不

能服事者准令終養

嘉靖十七年令百官母老有兄弟異母者許終養

按明會典嘉靖十七年奏准母老雖有兄弟同父異
母者亦准令終養

嘉靖二十一年令巡按及別差御史患病地方官具
實奏聞

按明會典嘉靖二十一年題准巡按并別差御史如
果患病不支許地方官具實奏聞不許徑自具奏

嘉靖二十七年令巡按御史告病回道自行具奏

按明會典嘉靖二十七年令巡按御史告病巡撫官
代奏者不准著回道自行具奏聽勘

嘉靖三十三年令御史在差患病許撫按官代奏回
籍

按明會典嘉靖三十三年題准御史在差患病有撫
按官代奏者仍准回籍調理

嘉靖三十四年令告假還葬官員照養病例

按明會典凡還葬嘉靖三十四年議准還葬官員照
養病事例作缺放回待事畢具文起送如違二年之
上亦照養病例革職

嘉靖四十二年定內外官遇本生父母亡故請給假
治喪

按明會典凡治喪嘉靖四十二年題准內外官員爲
人後遇本生父母亡故自願回籍者許給假治喪在
京照例具奏在外呈詳撫按就任放回定限二年餘
原籍起送改選如過三年者參究

嘉靖四十三年定各省親及還葬之例

按明會典嘉靖四十三年議准給假省親官照還葬

例作缺題放題准給假還葬者須三年考滿之後
方許具奏凡送親京官有老親隨任奏送還鄉者
量地方遠近定限俱作缺

穆宗隆慶二年定京官陞外告病之例

按明會典凡京官陞外告病隆慶二年議准患病在
先推陞在後比外官已到任者不同准令回籍養病
痊日給文赴部

隆慶三年令各邊督撫兵備等官患病聽巡按御史
轉奏

按明會典凡各邊督撫兵備等官患病隆慶三年奏
准不許自奏聽巡按御史勘明轉奏如有託疾避難
者該科及巡按御史參奏處治

隆慶四年令進士給假養病不得違限三年

按明會典凡進士養病隆慶四年題准但到部在三
年之外者不論起文日期俱照違限革職其三年赴
部而又稱中途患病者照有疾例致仕

隆慶五年詳定內外官給假之例

按明會典凡給假隆慶五年議准兩京給假省親送
子還葬官員俱要該衙門掌印官勘實代奏方准題
覆放回奏准京官患病先呈本衙門掌印官查勘
的確取具同鄉同僚官結狀代奏方准題覆凡五
城兵馬患病舊例致仕隆慶五年奏准照序班例不
分正副指揮俱准養病痊日起文赴部凡外官陞
京職未任患病隆慶五年議准行彼處撫按勘實放
回調理

隆慶六年令給假省親送子還葬官員得自奏請其
養病官員該司查驗收選

按明會典凡兩京給假省親送子遷葬官員俱要該衙門掌印官勘實代奏隆慶六年議准如遇掌印官無人代奏者徑自奏請題准養病官員起文在三年之內到部在三年之外者該司查驗果有本處官司印信保結照例收選

神宗萬曆元年令京官養病撫按官覈實具奏

按明會典萬曆元年奏准凡京官中途養病及先養病在籍未痊者須所在與原籍撫按官覈實具奏方與准理

萬曆二年令進士有疾掌印官驗實具題

按明會典萬曆二年題准今後進士有疾在京調理三月之後如果真病令各該辦事衙門掌印官親自驗實方與具題

萬曆六年令巡按御史養病行都察院勘實咨部

按明會典萬曆六年令巡按御史養病巡撫官代題者行都察院勘實咨部方准題覆

萬曆十年令京官告病限滿又稱患病者撫按官查勘

按明會典萬曆十年題准京官告病三年限滿又稱患病者不拘在籍在途行所在撫按官查勘如有詐託據實參處

萬曆十一年令京官患病危篤掌印官勘實代奏

按明會典萬曆十一年題准京官患病危篤不能久待者掌印官勘實即與代奏不拘注門籍二月

萬曆十三年令京官再奏養病准與題覆

按明會典萬曆十三年題准京官再奏養病者准與題覆再告違限者雖起文在三年之內亦不准理徑

行參究若請告至三止許告休不許轉假如有材難終棄者致仕之後聽撫按科道從公薦舉起用

欽定古今圖書集成經濟彙編銓衡典

第一百十卷目錄

給假部彙考二

皇清 順治三則 康熙十則

給假部藝文一

自陳表

朱顏延之

請假啓二首

鮑照

奏彈孔稚珪違制啓假事

梁沈約

奏彈奉朝請王希昉違假

前人

上廉察使啓

唐駱賓王

爲義興公求拜掃表

陳子昂

辭免召命狀

宋朱熹

給假部藝文二 詩

休沐重還丹陽道中

齊謝朓

休沐寄懷

梁沈約

旬假西亭寄呈熊郎中副使

劉孝綽

休沐山庭

陳江總

送常侍舒公歸觀

唐蘇頌

重送舒公

前人

送李給事歸徐州觀省

孫逖

送崔三往密州觀省

王維

休假還舊業

前人

送張七判官還京觀省

劉長卿

送許拾遺恩歸江寧拜親

岑參

送楊千牛赴歲赴汝南郡觀省便成婚

前人

奉送李賓客荆南迎親

前人

送許八拾遺歸江寧觀省

杜甫

送李校書二十六韻

前人

晚秋長沙蔡五侍御飲筵送殷六參軍歸澧州

前人

觀省

前人

送韓十四江東觀省

前人

奉送蜀州柏二別駕將中丞命赴江陵起居衛

尚書太夫人因示從弟行軍司馬佐

送陳供奉恩勅放歸觀省

前人

送邊補闕東歸觀省

錢起

送韋信愛子歸觀

前人

送嚴士良侍奉詹事南遊

前人

南谿始泛二首

韓愈

蘇州郡齋旬假命宴

白居易

任弘農尉獻州刺史乞假還京

李商隱

乞假歸題候館

薛能

休澣日謁西掖所知

溫庭筠

休日早起

宋陳去非

示祝四弟

朱熹

自鄧州幕府暫歸秋林

金元好問

觸石墜馬臥病蒙恩予告

元虞集

休日郊外

張養浩

四月朔日休沐雨中

明高啓

送楊太常歸省二首

何景明

在告書懷東可大

于慎行

病中遣懷

前人

宿雲樓閒坐

前人

贈錢季梁進士省觀歸壽其太夫人八十

楊承鯤

送趙栗夫歸省吳江

王鏊

給假部紀事

給假部雜錄

銓衡典第一百十卷

給假部彙考二

皇清

順治十年

大清會典京官省親送親祭祖還葬畢姻俱准給假

至引例各有年限往返各定定期凡祭祖必歷

俸十年省親必歷俸六年還葬必歷俸五年始

得引例奏請送親畢姻不拘年限凡各官給假

舊例俱限六箇月不開缺順治十年題准開缺

不定限

順治十一年

大清會典凡各官給假順治十一年議准酌量地方

遠近限定水程在家許住四箇月達限一年以

外者罰俸一年二年以外者革職

順治十七年

大清會典凡各官給假順治十七年議准各官必有

迫切事情方得引例請假取同鄉官印結具呈

堂上掌印官勘實代題若無堂上掌印官令同

官具結自行奏請吏部詳加覈實委無托故始行覆准如出結代奏不實者與本官分別議罪至在籍限期將滿復請病假者府縣官驗看真確取具印結撫按核明方准題請如托病遷延後經指叅者出結各官照例議罪

康熙五年

大清會典凡請假違限康熙五年題准八旗官員有以遷葬修墳或扶柩弔問等事請假者酌定限期給與路引違限者酌量議處

康熙九年

大清會典凡各官給假康熙九年議准告假官員在籍生事營私者照告病官例議處

康熙十年

大清會典凡官員告假現任官員有祖父母父母及親兄弟在外省駐防病故者其子孫兄弟欲往迎喪取該都統印結咨部准其給假六品以上具題七品以下註冊定限康熙十年題准在京官員祖父母父母在駐防地方患病欲往迎歸省觀者亦照例給假 凡各官給假康熙十年題准各官給假取本衙門堂官或同官或同鄉官印結具呈吏部代題准給執照回籍在家許住四個月往返路程直隸四個月山東河南山西六個月陝西浙江江南湖廣江西八個月福建廣東廣西四川貴州十個月雲南一年違限者議罪若俸深遇應陞之月告假者不准 又題准官員具呈吏部給假有已經奉旨而本衙門題留者仍准留任 又題准告假在籍

官員限期已滿該撫復請展期者不准行 凡候補內外各官因選期尚遠願告假者准其回籍俟到京銷假之日仍照原序補授康熙十年題准大選截取官員亦准給假選授之時仍照原序

康熙十二年

大清會典凡請假違限康熙十二年題准請假官員違限不及一月者免議違限一月者罰俸一個月二月者罰俸兩個月三月者罰俸三個月四五月以上罰俸六個月六七月以上罰俸九個月八九月以上罰俸一年一年以上降一級一年六個月以上降二級二年以上革職如果有病阻滯情由取具將軍城守尉及府州縣印結免議 吏部則例吏部覆准臺臣許條奏嗣後內外官員凡為人後者遇本生父母亡故及原繼母亡故有情願治喪者皆照親母治喪之例給假一年治喪康熙十二年九月內奉

旨依議

康熙十四年

大清會典凡各官給假康熙十四年題准大學士尚書左都御史侍郎學士副都御史等告假自行具奏其餘官員吏部代題假滿之日違限一年以上者罰俸一年二年以上者休致

康熙二十五年

大清會典凡候補內外各官康熙二十五年覆准候補科道給假者其遠近程限及違限處分俱與

現任給假例同

康熙四十一年

四月二十三日

上諭大學士王熙卿者年舊德歷官最久自去歲告病在家朕無日不注念老臣也近日九卿皆求扁額字對想卿身雖在告心未嘗一時不在朝中故特書扁一面對一聯臨米芾書一幅賜卿卿其勉強餐食輔以醫藥慰朕不忘舊臣之至意

康熙四十四年

吏部則例康熙四十四年六月直撫李題該臣看得河間府知府白為璣因繼母金氏病故丁憂離任嗣奉

上諭據河間府士民保留丁憂知府白為璣事出真誠白為璣著在任守制欽此隨即轉行欽遵在案今據白為璣呈稱為璣年甫十歲嫡母田氏生母侯氏相繼告殞璣之婚娶教育悉惟繼母是賴雖迎養任所承歡多缺今春奉辦差務及查賑平糶奔走驅馳刻無寧晷殯於三月初九日旋署而母即於十一日身故疾病未能奉侍湯藥弗獲親嘗今營葬大事若不請假躬親料理寸心實難自安况為璣之嫡母生母並諸兄之喪俱入厝未葬弟姪貧幼不能料理援照雲南鹽驛道李苾回籍治喪河南府知府趙于京回籍營葬之例呈請給假一月就近至京安葬等因奉

旨白為璣著給假兩個月該部知道